

北齊書卷十九

隋太子通事舍人李百藥撰

列傳第十一

賀拔允

蔡儻

韓 賢

尉長命

王 懷

劉 貴

任延敬

莫多婁貸文

高市貴

庫狄迴洛

庫狄盛

薛孤延

張保洛

侯莫陳相

賀拔允字可泥神武尖山人也祖爾頭父度拔俱見魏史允便弓馬頗有膽畧與弟岳殺賊帥衛可肱仍奔魏廣陽王元深上允爲積射將軍持節防滻口深敗歸余

朱榮允父子兄弟並以武藝知名榮素聞之見允待之甚厚建義初除征東將軍光祿大夫封壽陽縣侯邑七百戶永安中除征北將軍蔚州刺史進爵爲公魏長廣王立改封燕郡公兼侍中使茹茹還至晉陽值高祖將出山東允素知高祖非常人早自結託高祖以其北士之望尤親禮之遂與允出信都叅定大策魏中興初轉司徒領尚書令高祖入洛進爵爲王轉太尉加侍中魏武帝之猜忌高祖也以允弟岳深相委託潛使來往當時咸慮允爲變及岳死武帝又委岳弟勝心腹之寄高祖重其舊久全護之天平元年乃賜死時年四十八高

祖親臨哭之贈定州刺史五州軍事允有三子長子世文次世樂次難陦興和末高祖並召與諸子同學武定中勅居定州賜其田宅

蔡儻字景彥廣寧石門人也父普北方擾亂奔走五原守戰有功拜寧朔將軍封安上縣男邑二百戶尋卒贈輔國將軍燕州刺史儻豪爽有膽氣高祖微時深相親附與遼西段長太原龐蒼鷹俱有先知之鑒長爲魏懷朔鎮將嘗見高祖甚異之謂高祖云君有康世之才終不徒然也請以子孫爲託興和中啓贈司空公子寧相府從事中郎天保初兼南中郎將蒼鷹交遊豪俠厚待

賓旅居於州城高祖客其舍初居處於蝸牛廬中蒼鷹
母數見廬上赤氣屬天蒼鷹亦知高祖有霸王之量每
私加敬割其宅半以奉高祖由此遂蒙親識高祖之牧
晉州引爲兼治中從事史行義寧郡事及義旗建蒼鷹
乃棄家間行歸高祖高祖以爲兼行臺倉部郎中卒於
安州刺史儔初爲杜洛周所虜時高祖亦在洛周軍中
高祖謀誅洛周儔預其計事泄走奔葛榮仍背葛榮歸
入朱榮榮入洛爲平遠將軍帳內別將從破葛榮除諫
議大夫又從平元顯封烏洛縣男隨高祖舉義爲都督
高祖平鄆及破四胡於韓陵儔並有戰功太昌中出爲

濟州刺史爲治嚴暴又多受納然亦明解有部分吏民畏服之性好賓客頗稱施與後胡遷等據兗州作逆儻與齊州刺史尉景討平之魏武帝貳於高祖以濟州要重欲令腹心據之陰詔御史構儻罪狀欲以汝陽王代儻由是轉行兗州事高祖以儻非罪啓復其任武帝不許除賈顯智爲刺史率衆赴州儻防守嚴備顯智憚之至東郡不敢前天平中爲都督隨領軍婁昭攻樊子鵠於兗州又與行臺元子思討元慶和俱平之侯深反復以儻爲大都督率衆討之深敗走又轉揚州刺史天平三年秋卒於州時年四十二贈持節侍中都督冀州刺

史尚書令司空公諡曰威武齊受禪詔祭告其墓皇建
初配享高祖廟庭

韓賢字普賢廣寧石門人也壯健有武用初隨葛榮作
逆榮破隨例至并州余朱榮擢充左右榮妻子北走世
隆等立魏長廣王曄爲主除賢鎮遠將軍屯騎校尉先
是世隆等攻建州及石成賢並有戰功余朱度律用爲
帳內都督封汾陽縣伯邑四百戶普泰初除前將軍廣
州刺史屬高祖起義度律以賢素爲高祖所知恐其有
變遣使徵之賢不願應召乃密遣羣蠻多舉烽火有如
寇難將至使者遂爲啓得停賢仍潛遣使人通誠於高

祖高祖入洛余朱官爵例皆削除以賢遠送誠歎令其復舊太昌初累遷中軍將軍光祿大夫出爲建州刺史武帝西入轉行荊州事天平初爲洛州刺史民韓木蘭等率土民作逆賢擊破之親自按檢欲收甲仗有一賊窘迫藏於死屍之間見賢將至忽起斫之斷其脰而卒賢雖武將性和直不甚貪暴所歷雖無善政不爲吏民所苦昔漢明帝時西域以白馬負佛經送洛因立白馬寺其經函傳在此寺形制淳朴世以爲古物歷代藏寶賢無故研破之未幾而死論者或謂賢因此致禍贈侍中持節定營安平四州軍事大將軍尚書令司空公定

州刺史子喬嗣

尉長命太安狄那人也父顯魏鎮遠將軍代郡太守長命性和厚有器識扶陽之亂寄居太原及高祖將建大義長命叅計策從高祖破四胡於韓陵拜安南將軍樊子鵠據兗州反除東南道大都督與諸軍討平之轉鎮范陽城就拜幽州刺史督安平二州事州居北垂土荒民散長命雖多聚斂然以恩撫民少得安集尋以疾去職未幾復徵拜車騎大將軍都督西燕幽滄瀛四州諸軍事幽州刺史卒於州贈以本官加司空謚曰武壯子興敬便弓馬有武藝高祖引爲帳內都督出爲常山公

府叅軍事賜爵集中縣伯晉州民李小興羣聚爲賊興
敬隨司空韓軌討平之進爵爲侯高祖攻周文帝於邙
山興敬因戰爲流矢所中卒贈涇岐幽三州軍事爵爲
公謚曰閔莊高祖哀惜之親自臨弔賜其妻子祿如興
敬存焉子士林嗣

王懷字懷周不知何許人也少好弓馬頗有氣尚值北
邊喪亂早從戎旅韓樓反於幽州懷知其無成陰結所
親以中興初叛樓歸魏拜征虜將軍第一領民酋長武
周縣侯高祖東出懷率其部人三千餘家隨高祖於冀
州義旗建高祖以爲大都督從討余朱兆於廣阿破之

除安北將軍蔚州刺史又隨高祖攻鄴克之從破四胡
於韓陵進爵爲侯仍從入洛拜車騎將軍改封盧鄉縣
侯天平中除使持節廣州軍事梁遣將湛僧珍楊暕來
寇懷與行臺元景擊須城拔之擒暕又從高祖襲克西
夏州還爲大都督鎮下館除儀同三司元象初爲大都
督與諸將西討遇疾卒於建州贈定幽恒肆四州諸軍
事刺史司徒公尚書僕射懷以武藝勲誠爲高祖所知
志力未申論者惜其不遂皇建初配饗高祖廟庭

劉貴秀容陽曲人也父乾魏世贈前將軍肆州刺史貴
剛格有氣斷歷任朱榮府騎兵叅軍建義初以預定策

勲封敷城縣伯邑五百戶除左將軍大中大夫尋進爲公榮性猛急貴尤嚴峻每見任使多懷榮心遂被信遇位望日重加撫軍將軍永安三年除涼州刺史建明初余朱世隆專擅以貴爲征南將軍金紫光祿兼左僕射西道行臺使抗孝莊行臺元顯恭於正平貴破顯恭擒之并大都督裴儻等復除晉州刺史普泰初轉行汾州事高祖起義貴棄城歸高祖於鄴太昌初以本官除肆州刺史轉行建州事天平初除陝州刺史四年除御史中尉肆州大中正其年加行臺僕射與侯景高昂等討獨孤如願於洛陽貴凡所經歷莫不肆其威酷修營城

郭督責切峻非理殺害視下如草芥然以嚴斷濟務有益機速性峭直攻訐無所迴避故見賞於時雖非佐命元功然與高祖布衣之舊特見親重興和元年十一月卒贈冀定并殷瀛五州軍事太保太尉公錄尚書事冀州刺史謚曰忠武齊受禪詔祭告其墓皇建中配享高祖廟庭長子元孫員外郎肆州中正早卒贈肆州刺史次子洪徽嗣武平末假儀同三司奏門下事

任延敬廣寧人也伯父桃太和初爲雲中軍將延敬隨之因家焉延敬少和厚有器度初從葛榮爲賊榮署爲王甚見委任榮敗延敬擁所部先降拜鎮遠將軍廣寧

太守賜爵西河縣公後隨高祖建義中興初累遷光祿大夫太昌初累轉尚書左僕射進位開府儀同三司延敬位望既重能以寬和接物人士稱之及斛斯椿薨發延敬棄家北走至河北郡因率土民據之以待高祖魏武帝入關荆蠻不順以延敬爲持節南道大都督討平之天平初復拜侍中時范陽人盧仲延率河北流人反於楊夏西兗州民田龍聚衆應之以延敬爲大都督東道軍司率都督元整叱列陁等討之尋爲行臺僕射除徐州刺史時梁遣元慶和及其諸將寇邊延敬破梁仁州刺史黃道始於北濟陰又破梁雋於單父俘斬萬人

又拜侍中在州大有受納然爲政不殘禮敬人士不爲民所疾苦潁川長史賀若徽執刺史田迅據城降西魏復令延敬率豫州刺史堯雄等討之西魏遣其將怡鋒率衆來援延敬等與戰失利收還北豫仍與行臺侯景司徒高昂等相會共攻潁川拔之元象元年秋卒於鄴時年四十五贈使持節太保太尉公錄尚書事都督冀定瀛幽安五州諸軍事冀州刺史子胄嗣胄輕俠頗敏惠少在高祖左右天平中擢爲東郡太守家本豐財又多聚斂動極豪華賓客往來將迎至厚尋以贓汚爲有司所劾高祖捨之及解郡高祖以爲都督興和末高祖

攻玉壁還以晉州西南重要留清河公岳爲行臺鎮守
以胄隸之胄飲酒遊縱不勤防守高祖責之胄懼遂潛
遣使送款於周爲人糾列窮治未得其實高祖特免之
謂胄曰我推誠於物謂卿必無此理且黑獵降人首尾
相繼卿之虛實於後何患不知胄內不自安是時儀同
余朱文暢及叅軍房子遠鄭仲禮等並險薄無賴胄厚
與交結乃陰圖殺逆武定三年正月十五日因高祖夜
戲謀將竊發有人告之令捕窮其事皆得實胄及子弟
並誅

莫多婁貸文太安狄那人也驍果有膽氣從高祖舉義

中興初除伏波將軍武賁中郎將虞候大都督從擊余
朱兆於廣阿有功加前將軍封石城縣子邑三百戶又
從破四胡於韓陵進爵爲侯從平余朱兆於赤谼嶺兆
窮迫自經貸文獲其屍遷左廂大都督斛斯椿等釁起
魏武帝遣賈顯智據守石濟高祖令貸文率精銳三萬
與竇泰等於定州相會同趣石濟擊走顯智天平中除
晉州刺史汾州胡賊爲寇竊高祖親討焉以貸文爲先
鋒每有戰功還賚奴婢三十人牛馬各五十匹布一千
疋仍爲汾陝東雍晉泰五州大都督後與太保尉景攻
東雍南汾二州克之元象初除車騎大將軍儀同南道